

BATAKURU PUULUSA ARANURU

HAA E 'BE KORENTI 'BEN

1 ¹Immorde e an min Puulusa, mo Alla noddiri kodduruyee mun on fii wonugol *sahaabaajo Iisaa Almasiihu on, e oo musiddo wi'eteedo Sosteene, ²haa e ngal *moftal Alla wongal Korenti, subiraabe humondiral e Iisaa Almasiihu on, noddaabe wonugol yimbe Alla, wondude e kala jantotoobe innde Iisaa Almasiihu Joomi men on nokku kala ka be woniri, dun ko on Joomi mabbe e Joomi men.
³ Yo moyyere e buttu wonan on, immorde e Alla Baaba men, e Iisaa Almasiihu Joomi on.

Fii no Puulusa Jarniri Alla fii 6e Korenti 6en

⁴ Mido duumii e jarnugol Alla fii mon, fii moyyere nde Alla yedi on nden sabu Iisaa Almasiihu on, ⁵dun ko e nder humondiral e makko aldirdon kala huunde e kala kongol e kala gandal. ⁶Ko fii seeditoore *Almasiihu on tabintinaama few e mon. ⁷Ko dun wadi jooni, dokkal woo yakkanaa on e nder ndee habbannde nde wondon e mun fii feenoygol Iisaa Almasiihu Joomi men on. ⁸O tiidinay on kadi haa ka rawnoode, fii wota on laatoyo felniibe jande ardu Iisaa Almasiihu Joomi men on.⁹ Alla ko Sella-Findeejo, dun ko on Noddudo on fii yubbondirgol e Biddo makko on, Iisaa Almasiihu Joomi men on.

Fii Sendondiral Mofte Korenti den

¹⁰ Mi wakkilinii on, yo musibbe, e innde Iisaa Almasiihu Joomi men on, on fow jogee kongol gootol fii wota sendondiral wonu hakkunde mon, e maanaa fedde-fedde, kono wonee e nder nanondiral tiifungal e nder mijo wooto e hakkille goote. ¹¹Ko fii, yo musibbe an, bee yimbe oo debbo wi'eteedo Kuluyee humpitii lan fii mon wonde, yeddondire no hakkunde mon. ¹²Mi nanii wonde mo

kala e mon no wi'a «min, ko mo mi Puulusa», oya kadi wi'a «ko mo mi Apoloosi», goddo on kadi wi'a «ko mo mi Petruusu», oya on wi'a «ko mo mi Almasiihu on!»

¹³ E hara Almasiihu on senditino? Kaa Puulusa fempano fii mon? Kaa ko e innde Puulusa *lootiradon maande kisiyee? ¹⁴ Awa mi weltanike Alla ko tawi kon mi lootaali hay gooto e mon maande kisiyee, si hinaa Kirispusa e Gayuusi. ¹⁵ Ko dñun wadi, hay gooto waawataa wi'ude ko e innde an lootiradon maande kisiyee. ¹⁶ Mi lootii kadi ɓeynguure Astefaana nden, ko heddi kon, mi andaa si mi lootii goddo goo. ¹⁷ Ko fii Almasiihu on nulaali lan fii lootugol maande kisiyee, kono ko fii fejningol Kibaaru Moyyo on. Dun non, hinaa immorde e kongudi faamu neddanke, fii wota *leggal altindiraangal Almasiihu on meerine.

Fii Faamu Aduna on e Faamu Allaahu on

¹⁸ Ko fii kibaaru leggal altindiraangal ngal no wa'ani wonbe mulude ben wa feetere. Kono enen, wonaabe dandeede ben, ko o bawgal Alla. ¹⁹ Ko fii no windii:
 «Mi mulay faamu faamube ben,
 mi mehindina hakkillaaji jooma-hakkil en.»^a

²⁰ Awa ko honto woni faamudo on, maa fensitoowo on, maa liddondirteedo e nguu jamaanu on woni? E hara Alla waylaali faamu aduna on, watti feetere? ²¹ Ko fii, bay aduna on e faamu mun ngun andaali Alla e nder faamu Alla ngun, tawi no wela Alla ka o dandira gomdinbe ben waaju men wa'ungu wa feetere ngun. ²² Tawi *Yahuudiyankeebé ben no landoo fii maandeeji hawniidi, *Gereekiyankeebé ben kajun no dabba faamu ngun, ²³ kono enen hidé waajaade fii Almasiihu fempaado on. Dun no wonani Yahuudiyankeebé ben peggal, wa'ani ɓe wonaa Yahuudiyanke ben wa feetere, ²⁴ kono noddaabe ben, woni ko Yahuudiyanke, woni ko Gereekiyanke, Almasiihu on ko bawgal Alla e faamu makko kanko Alla. ²⁵ Ko wa'i

^a1.19 Isa. 29.14

wa feetere iwrunde ka Alla nden no buri faamu yimbe ben. Awa kadi, ko wa'i wa lo'ere iwrunde ka Alla nden no buri doole yimbe ben.

²⁶ Mijitee, yo musibbe, no wonirnodon fewndo noddadon. E yeeso neddanke, tawi buy e hakkunde mon wonaa faamube, maa marbe doole, maa rimbe. ²⁷ Kono Alla subike piiji wa'udi wa feetudi e nder oo aduna fii hersingol faamube ben, Alla subii kadi piiji wa'udi wa lo'udi e nder oo aduna fii hersingol dolnudi din. ²⁸ Alla subii kadi piiji kaanudi din e oo aduna, din anaadi, din di wonaano huunde, fii mehindingol woodaadi din, ²⁹ fii wota hay gooto mawnintino yeeso Alla. ³⁰ E hin-le, ko kanko humindiri on e Iisaa Almasiihu on, on mo tawata ko e immorde e Alla wadiraal fii men faamu e peewal e *senaare e cottudi, ³¹ fii, wano windori non:

«On mo no mantoo,
yo mantor Joomiraado on.»^b

2 ¹ Min non, yo musibbe an, fewndo mi yahunoo ka mon fii fejnangol on goonga Alla wirnoodo on, hinaa burnondiro kongudi maa faamu mi yaari. ² Ko fii mi taw moyyaa ka mi ndaara godsun goo hakkunde mon, si hinaa Iisaa Almasiihu, fempaado on. ³ Min tigi mido wonirnoo takko mon e noone no lo'iri e kulol e diwnol tiidungol. ⁴ Kongol an ngol e waaju an ngun aldaano e kongudi weldi e faamu neddanke, kono ko wondunoodi e maandeeji bangindi bawgal Ruuhu Alla on, ⁵ fii wota gomdinal mon ngal iwrud e faamuji yimbe ben, kono e bawgal Alla ngal.

Fii Faamu Haqiqawu ngun

⁶ Kono fow e mun, ko faamu men waajotoo mokobaabe ben, hara ko faamu ngu tawata hinaa ngu oo aduna, hinaa ngu laamuji oo aduna kadi muloyteedi. ⁷ Ko faamu Alla wonden waajaade, dñu ko ngun wirninoongu e nder gundoo, ngu Alla ebbannoo fii darja men on ado aduna on tageede. ⁸ Laamu woo e dii laamuji oo

^b1.31 Yer. 9.23

aduna andaano dun. Ko fii si ɓe anduno, ɓe fempataano on Jom mangural.⁹ Kono ko wano windori non:

«Ko Alla ebbani yidube mo ɓen kon,
kodun woni yiitere yi'aali, nowru nanaali,
e ko ɓernde neddanke mijaaki.»^c

¹⁰Ko e men Alla ɓanginiri dun Ruuhu mun on.

Ko fii Ruuhu on hollay ko woni woo, hay piiji Alla luggudi din.¹¹ Ko hombo e hakkunde yimbe ɓen andi ko woni e neddo, si hinaa ruuhu wondo e makko on. Ko wano non kadi, gooto waawataa andude ko woni e Alla, si wonaa Ruuhu Allaahu on.¹² E hin-le enen, hinaa ruuhu oo aduna hendiden, kono ko Ruuhu iwrudo e Alla, fii no andiren ko Alla yediri en sulfu makko on kon.¹³ En alaa wowlirde dun yewtereeji di faamu neddanke jannata, kono kodii Ruuhu Allaahu on jannata din, e nder sifanagol yimbe ɓe on Ruuhu woni e mun ɓen haqiiqaaji iwrudi e on Ruuhu.¹⁴ Kono neddo mo aldaa e Ruuhu Allaahu on jabataa piiji Ruuhu Alla din, ko fii ko di feetere e makko, o waawataa di andude, ko fii ko Ruuhu Allaahu on di taskortee.¹⁵ Kono neddo mo Ruuhu Allaahu on woni e mun on taskoto ko woni woo, kono kanko hay gooto hewtaa taskagol mo.¹⁶ E hoore dun:

«Ko hombo andi mijo Joomiraado on fii jannugol mo?»^d

E hin-le enen ko mijo *Almasiihu on jogiden.

Fii no Kurkaadi Alla din Haani Wonirde

3 ¹Kono min non, yo musibbe, mi waawaali on yewtirde wa yimbe ɓe Ruuhu Allaahu on woni e mun, kono ko wa jokkubé mbeleede ɓandu, e booboobé e telen-ma gomdinal *Almasiihu on.² Kobiraadan mi jonnunoo on, hinaa jaametee teddudo, ko fii on waawataano mo townude. Hay fewndo doo non on waawataa

^c2.9 Isa. 64.3

^d2.16 Isa. 40.13

mo townude.³ Ko fii haa jooni ko on jokkubé mbeleede bandu. Bay nawliigu e yeddondiral no hakkunde mon, taw si hinaa on jokkubé mbeleede bandu? Kaa hinaa no neddanke fow wonirta non wonirdon?⁴ Si goddo e mon wi'ii: «min ko mo mi Puulusa», oya on wi'a: «ko mo mi Apoloosi», taw si hara on gerdaali wa yimbe aduna?

⁵ Awa ko hondun woni Apoloosi? E ko hondun woni Puulusa? Ko kurkaaduubé be gomdinirdon sabu mun. Mo kala e mabbe kurkorani Joomiraado on golle de o halfini mo den.⁶ Min mi tutu, Apoloosi yarni, kono ko Allaahu on mawnini.

⁷ Kodun wadi hinaa tutudo on woni goddun, hinaa kadi yarnudo on, kono ko Alla mawnindo on. ⁸Tutudo on e yarnudo on no fota, mo kala e mabbe hendoto njoddi mun ndin tigi tippude e golle de ontigi wadi den.⁹ Ko fii, ko men gollidoobe fii Alla, onon ko on ngesa Alla, ko on darnoodi makko kadi. ¹⁰Wano Alla yedirimmi moyfere non, mi golliri wa faamudo fii darnugol, mi wadii ndelo ngon. Goddo kadi darnii e hoore mun, kono yo mo kala reeno e noone no darnirta e hoore mun non. ¹¹Fii ndelo ngon kan, hay gooto waawataa moyfynde ndelo goo si wonaa wongo don ngon, e maanaa d'un ko Iisaa Almasiihu on. ¹²E hin-le, si goddo aru e darnirde e hoore ngon ndelo don maadi kaanje maa kaalisi maa kaayé hittude maa ledse maa hudo kalin maa foron foyne, ¹³haray kuugal mo kala feenay.Nalaande nden banginay dun, ko fii yiite ngen fejjinoyay ngal, nge ndarndoo kadi noone kuugal mo kala. ¹⁴Si tawii kuugal ngal goddo darni e hoore ndelo ngon tabitii, ontigi hebay njoddi.¹⁵ Si tawii kuugal goddo sumii, haray o fadii, kono kanko tigi o dadiray wa fuutiido yiite.

¹⁶ E on andaa ko onon woni suudu Alla ndun, awa kadi Ruuhu Allaahu on no hodi e mon? ¹⁷Kala bonnudo suudu Alla ndun, Alla bonnay fii makko, ko fii suudu Alla ndun ko hormordu. Awa ko onon woni ndun. ¹⁸Wota gooto daynito. Si goddo e mon mijike wonde ko o faamudo e oo aduna fewndiido, haray yo o laato

«feetudo» fii yo o wonu faamudo.¹⁹ Ko fii faamu oo aduna ko «feetere» yeeso Alla. Ko fii no windii:

«O nangiray faamube ben yoyreeji mabbe din.»^d

²⁰No windii kadi:

«Joomiraado on no andi miijooji faamube ben,
himo andi kadi ko di meere.»^e

²¹Awa wota hay gooto mantor yimbe ben. Ko fii fow ko onon jeyi:²² woni ko Puulusa, woni ko Apoloosi, woni ko Petruusu, woni aduna on, woni ngurndan dan, woni mayde nden, woni piiji fewndiidi din, woni piiji aroyooji din, fow ko onon wonani.²³ Awa kadi, ko on be Almasiihu on, Almasiihu on kadi ko mo Alla.

4 ¹Kodun wadi, yo men jogore wa kurkaadi *Almasiihu on e halfinaabe goongaaji Alla wirniidi din. ²Awa halfinaabe ben non no toraa wonugol sella-findeebe. ³Min non jaawoore nde jaawotommi nden e nde yimbe ben jaawatammi nden hittaa e an, min tigi toode mi jaawitotaako.⁴ Ko fii fondo an ngon ko laabungo, fii kala hinaa dun hollata ko mi feewudo, jaawoovo lan on ko Joomiraado on. ⁵Kodun wadi, wota on jaawu huunde doo e saa'i on, maa doo e ardu Joomi on, on Weebitoovo ka ndaygu ko suudii kon ka nibe, fejjnina ebbooje berde den. Ko fii mantoore mo kala aroyay immorde e Alla.

Fii Mawnintinaare be Korenti ben

⁶Musibbe, mi huutorii dii nooneeji doo fii wadangol on misal e hoore an min e Apoloosi. Ko nii andirton e amen wota mo yawtu ko windii kon, e wota gooto e mon mantor bambindirangol. ⁷Ko fii ko hombo burnu-maa? E ko hondun jogidaa ko a okkaaka? E si a okkaama, ko fii hondun mantantodaa, wa si tawii hinaa a okkaado?

^d3.19 Ayb. 5.13

^e3.20 Zab. 94.11

⁸ Dun-le wuren on haarii, awa kadi on aldii, on fuddike laamaade e ɓaa wo amen! Pellet mi faaleteno hara nun ko on lambe fii menen kadi no men laamodira e mon! ⁹ Ko fii no wa'animmi wa si tawii Alla wattirii men, menen *sahaabaabe ben ɓaa wo, wa jaawaabe happanaa wareede e yeeso dental ngal fow, ko fii men wonanii aduna on fow e malaa'ikaabe ben e yimbe ben jalmori. ¹⁰ Ko men jogoraabe wa feetube sabu Almasiihu on, kono onon ko on faamuße sabu Almasiihu on! Ko men jogoraabe wa lo'ube, kono onon ko on dolnuße. Ko on teddinaabe, kono menen ko men hayfinaabe! ¹¹ Haa jooni meden tampiri heege e donka e kolngal^f e piggal e yiilagol. ¹² Meden golliri juude amen den tigi haa meden ronki. Tuma men hoynaa woo, men du'anoo. Tuma men cukkaa woo, men wakkiloo. ¹³ Tuma men jo'aa woo, men jaabora no newori. Men woni tuundi oo aduna, men hawkaa e di fow, haa weetaango hande ngoo.

¹⁴ Hinaa fii hersingol on mi windiri dun, kono mido hajorde on wa faybe an be mi yidi. ¹⁵ Kodun wadi, hay si on heboyii guluuje sappo ardotoobe on fii no jokkiron laawol Almasiihu on, haray on alaa baabaabe buy. Ko fii, e telen-ma humondiral mon e Iisaa Almasiihu on, ko min wonti baaba mon e nder ko mi fejnjinani on Kibaaru Moyyo on kon. ¹⁶ Awa mi wakkilinii on yo on wonu nemboobe lan. ¹⁷ Kodun wadi si mi imminanii on Timotee, on mo tawata ko paykun an mo mi yidi, e sella-findeejo e telen-ma Joomiraado on. O andintinay on laawi andin fow e telen-ma Almasiihu on, wano mi janniri di non hen fow e nder *mofte den fow kadi.

¹⁸ Wobbe e mon mawnintinike wa si tawii mi yiltitotaako ka mon. ¹⁹ Kono mi yahay ka mon ko neebaa, si Joomiraado on jabii. Hinaa kongudi mawnintiniibe ben tun mi andoyta, kono ko bawgal mabbe ngal kadi. ²⁰ Ko fii *laamu Alla ngun

^f4.11 Maa: «kolndan».

wonaa haalaaji, kono ko bawgal.²¹ Ko hondun faaladon? Ko yo mi yaadu ka mon e sawru, kaa ko giggol e newaare?

Fii Hiwugol Moftal ngal

5 ¹Awa saa'i woo jiibaare goo no naneede hakkunde mon, hara ko jiibaare nde yi'etaake hay ka 6e gomdinaa 6en, hay goddo e mon no murtini beyngu ben mun!
²Onon e ndee mawnintinaare mon! Hidon haanunoo yoomude! Suuton on wadudo ngal kuugal e hakkunde mon.³ Min oo mo wondaa e mon ka bandu, kono wondudo e mon ka bernde, mi jaawirii wadudo sifa ngal kuugal on toode wa si mido wondi e mon.⁴ Awa fewndo mottondirdon e innde Iisaa Joomi on, tawi mido wondi e mon ka bernde, wondude e bawgal Iisaa Joomi men on,⁵ yo on neddo accide e Ibuliisa fii no jikku makko junuubankeejo on halkiree, e fii no ruuhu makko on dandiree jande ardu Joomi men on.

⁶Nden mawnintinaare mon moyyāa. E hara on andaa lewen seeda nii no yurina farin jiibaado fow?⁷ Seedee e lewen kiddo on, fii no laatoron farin jiibaado keso, bay ko on 6e aldaa e lewen. Ko fii *Almasiihu on, ngin baalii men layya fii *Juldeere Yawtaneede nden, hirsamaa.⁸ Awa wota en wadir juldeere nden lewen kiddo, maa lewen bonki e bone, kono wadiren nde bireedi laabal e goonga, de aldaa e lewen.

⁹Mi windanii on ka nder batakuru an wonde, wota on humondir e jeenoobe 6en.
¹⁰Kono hinaa fii mido faalaa wi'ude bee tun selon bee yimbe oo aduna, jeenoobe, maa reeredube, maa jattoobe, maa rewoobe sanamuucci.Si hinaa dun, haray bee yalton e oo aduna.¹¹ Ko mi windani on kon jooni, ko wota on humondir e goddo wi'udo ko musiddo mon e gomdinal, hara ko jeenoowo, maa ndeereero, maa rewoowo sanamu, maa hoynoowo, maa mandiloowo, maa jattoowo, e hay wota on jaamidu toode e sifa on neddo.

¹² Ko fii hondun mi jaawanta ɓe gomdinaa ɓen? Hinaa onon woni jaawooɓe gomdinbe ɓen?¹³ Be gomdinaa ɓen kan, Alla jaaway ɓe. Awa yaltinee bondo on hakkunde mon.^g

Fii Yaafondiral Gomdinbe ɓen

6 ¹ Si goddo e mon lurridii e goddo, e hara o suusay wullitaade e ɓe feewaa ɓen, o acca yimbe Alla ɓen? ² E on andaa yimbe Alla ɓen jaawoyay oo aduna? Si tawii ko onon haani jaawude aduna on, hara on waawataa jaawugol haajuuji di hittaa din? ³ E on andaa en jaawoyay malaa'ikaabe ɓen? E ko hondun non hadata jaawen haajuuji oo aduna? ⁴ Awa si tawii hidon mari lurrall hakkunde mon fii haajuuji aduna din, hara ko yimbe ɓe *moftal ngal hayfini ɓen wadoton jaawooɓe? ⁵ Ko fii hersingol on mi wowliri dun. Taw si hay gooto faamudo, waawudo jaawude hakkunde musibbe mun alaa hakkunde mon? ⁶ E hin-le goddo no wullitaade e hoore musiddo mun yeeso ɓe gomdinaa ɓen!

⁷ Onon non, ko ko wadi haa jaawindirdon kon holli wonde on foolaama few. Sitta nde wadadon bone, maa hippadon.⁸ Kono ko onon woni wadude angal peewal ngal, jatta beya, e hin-le ko musibbe mon.

⁹ Wota on daynito! E on andaa boyliibe ɓen maraa gebal ka *laamu Alla? Hinaa jiibiibe ɓen, hinaa kadi rewoobe sanamu ɓen e jeenoobe ɓen e worbe waditiibe rewbe ɓen e worbe jinoobe worbe ɓen ¹⁰ e wuybe ɓen e himmube ɓen e mandiloobe ɓen e hoynoobe ɓen e jattoobe ɓen, woni ko mari gebal ka laamu Alla. ¹¹ Awa kodun wobbe e mon wonnoo. Kono Ruuhu Alla men on lootii on, *labbinii on, o jogorii on feewube e innde Iisaa Almasiihu Joomi on.

^g5.13 Yaj. 17.7

Fii Wodditagol Jinaa

¹² Mido newnanaa fow, kono hinaa fow nafata. Mido newnanaa fow, kono mi accataa ko woni woo waawammi. ¹³ Neemaaji din ko fii reedu, reedu ndun kadi fii neemaaji din, Alla kadi mulay di fow. Awa kadi 6andu ndun hinaa fii jinaa, kono ko ndu fii Joomiraado on, Joomiraado on kadi fii 6andu ndun. ¹⁴ Awa kadi Alla, on Immintindo Joomi on, immintiniray en bawgal makko ngal. ¹⁵ E hara on andaa wonde koballi mon din woni tere *Almasiihu on? E hara mi yettay tere Almasiihu on, mi yubbindira e cagaajo? Pellet oo'o! ¹⁶ E on andaa kadi, mo yubbindiri hoore mun e cagaajo, haray kanko e makko kobe 6andu wooturu? Bay no windii: «Kambe dido be wonay gooto.»^{h17} Kono, on humondirdo e Joomiraado on, haray kanko e makko ko be ruuhu gooto.

¹⁸ Wodsitee jinaa on! E junuubu goo mo neddo wadata, hara on junuubu hinaa tabitoowo ka 6andu. Kono on jokkudo jinaa, haray kobandu makko ndun tigi o woni wadande junuubu. ¹⁹ E hari on andaa dundoo? Ko 6andu mon ndun woni suudu *Ruuuhu Seniido wondo e mon on, on mo Alla okki on. Hinaa onon jeyi hoore mon, ²⁰ ko fii on sooditaama coggu sattungu. Awa teddiniree Alla 6alli mon din.

Fii Desal e Sunningol

7 ¹Jooni feyjen e ko windandon mi kon. No moyani gorko hara o meemaali debbo. ²Kono non fii reenagol e jinaa, yo mo kala hebu beyngu, debbo kala heba moodi.³ Gorko on jonnita beyngu mun ko handi kon, debbo on kadi wano non e telen-ma moodi mun. ⁴Ko fii debbo on jeyaa 6andu mun ndun, kono ko moodibbo on, gorko on kadi wano non, o jeyaa 6andu makko ndun, kono ko beyngu makko jeyi ndu. ⁵Wota on salondir, si hinaa e saa'i nanondiral mon, fii no hebiron saa'i no tororon Alla. Bawto dun yiitidon, fii wota Ibuliisa foolir on angal waawugol

^h6.16 Fud. 2.24

hoore mun.⁶ Kono mi wowliraali dun wa si ko yamiroore, kono ko ko newnaa.

⁷ Mido yelii yo neddo fow wa'u wa an min, kono mo kala no mari dokkal feerewal, ngal Alla yedi dun, mo kala e noone goo.

⁸ Be resaa ben non e keynguube ben, mi wi'ay no moyyani be no be wa'ira wa an min. ⁹ Kono si be waawataa hoore mabbe, ko yo be resu, ko fii ko resugol buri bittorgol faale feyyitudo. ¹⁰ E telen-ma yettindirbe ben non, e hino ko mi wi'ata kon, (hinaa non min yamiri, kono ko Joomiraado on), wota debbo sertu e moodi mun. ¹¹ Si kanko debbo on non o aru e serteede, yo o joodo hara o yettaaka, maa o moyyintinida e moodi makko. Awa kadi wota gorko jonnitu beyngu mun.

¹² Fii beya, (fundoo ko min wowli, hinaa Joomiraado on), si musiddo goo no mari debbo mo gomdinaa, hara on debbo no yidi wondugol e makko, wota o seedu e makko. ¹³ Si tawii kadi debbo no mari moodibbo mo gomdinaa, hara on gorko no yidi wondude e on debbo, wota o seedu e moodi makko. ¹⁴ Ko fii moodibbo mo gomdinaa ko jeyaado Alla sabu debbo makko gomdindo on, debbo mo gomdinaa on kadi ko jeyaado Alla sabu moodibbo makko gomdindo on. Si hinaa dun, bibbe monben wonay wodfondirbe e Alla, e hara-le wurin ko be badondirbe e Alla. ¹⁵ Si tawii mo gomdinaa on no catii e seedugol, yo gomdindo on newnan mo dun. Ko fii hay huunde wadfaaki musiddo gomdindo e dun, Alla ko noddiri en ko wuurugol e nder buttu. ¹⁶ E hoore dun, ko honno debbo andirta si o danday moodi makko? Maa si gorko danday beyngu mun?

¹⁷ Ko woni tun, yo mo kala jokkir no Joomiraado on wadirani dun non, e noone noddaandu ndu o hebiri Alla ndun. Ko nii mi yamiriri e nder *mofte den fow.

¹⁸ On mo noddeede mun tawi sunninaama, yo o wonir no o sunniniraa non. On mo noddeede mun tawi sunninaaka, wota o etosunnineede. ¹⁹ Sunninegol* ngol wonaa huunde, angal sunninegol kadi wonaa huunde, kono kodoftagol yamirooje Alla den woni godsun. ²⁰ Yo mo kala wonir no wonirnoo non fewndo o noddaa. ²¹ Si tawii fewndo noddadaa ko a jiyaado, wota a aanu, kono si tawii hida

waawi rindude, haray eto.²² Ko fii jiyaado mo Joomiraado on noddi, haray o wonii mo Joomiraado on rindini. Ko wano non kadi, dimo mo Joomiraado on noddi, haray o wonii jiyaado *Almasiihu on.²³ Awa on sottiraama coggu sattungu, wota on wontu maccube yimbe ben.²⁴ Yo mo kala, yo musibbe, woniran Alla noone no wonirnoo non wa fewndo ko o noddaa.

²⁵ E telen-ma be yettaali yettaaka ben, wonaa yamiroore Joomiraado on mi hendii. Kono ko fewjoore an nden mi woni on jonnude, wa neddo sella-findeejo sabu yurmeende Joomiraado on.²⁶ E hino ko mi mijii no moyyi kon, sabu satteendeeji fewndiidi din: no moyani neddo ka o wonira no o woniri non.²⁷ Si hisa tiggunoo, wota a dabbu seedigal. Si a tiggaa, wota a dabbu tiggugol.²⁸ Kono, si a resii, haray a wadaali junuubu. Si jiwo kadi resaama, haray o wadaali junuubu. Kono non yimbe resindirbe ben fottay e tampereeji, mi faalaa on dandude di.

²⁹ E hino ko mi wi'ata kon, yo musibbe an: saa'i on ko rabbidudo. Jooni, on mo no mari suddido, yo wa'u wa mo alaa.³⁰ Ben wonbe wullude, yo wa'u wa si be alaano wullude. Ben wonbe kadi weltaade, yo wa'u kadi wa si be alaano weltaade. Soodoobe ben kadi, yo wa'u wa si be maraano,³¹ e ben wonbe huutorde oo aduna, ka haqiiqa, yo wa'u wa si tawii be alaano huutorde. Ko fii mbaadi oo aduna feyyay.

³² E hin-le mi faalaaka yo on wondu e annde. On mo tiggaali, ko fii haajuuji Joomiraado on hittini, no o weltinira Joomiraado on.³³ On resudo non, ko fii haajuuji aduna hittini, no o weltinira beyngu makko.³⁴ Haray himo senditii. Wano non, debbo mo resaaka maa jiwo, ko fii Joomiraado on hittini, fii no o laatora laabudo ka bandu e ka ruuhu. Debbo resaado on non ko fii haajuuji oo aduna hittini, no o weltinira moodi makko.³⁵ Ko nafa mon mi wowliri dun, hinaa fii faadfinangol on, kono ko fii addugol on e ko haani kon e ko laabi kon, e no humoron e Joomiraado on, hara on dillaali.

³⁶ On mo no tanyinii ko lo'udo e fee jiwo mo o yami, feyyudo duubi kellefuyee, o tawi yettindirgol e makko no moyyi, yo o wadu ko o faalaa kon, haray o wadaali junuubu si be resindirii. ³⁷ Kono on anniyido ka bernde mun haa tabiti wonde o tiggataa on jiwo, hara ko e yidi makko kanko tigi, e hoore himo wawti faaleeji makko, haray o wadii ko moyyi. ³⁸ Awa ko nii woniri: on tiggudo jiwo mo o yami on, haray o wadii ko moyyi, on mo tiggaali jiwo mo o yamaynoo on kadi, burtu moyyinde.

³⁹ Debbo no humondiri e moodi mun fannin moodi makko no wuuri. Kono si gorko on maayii, haray no newanii mo reseede ka o faalaa woo, ko woni tun, ko yo taw ko no yaadiri e faale Joomiraado on. ⁴⁰ E mijo an, ka o burata hettaade, ko si o wonirii wano o woniri non, bay min kadi mido tanyinii Ruuhu Allaahu on no e an.

Fii Naamugol Tebbeeli Sakkanaadi Sanamuji

8 ¹ E telen-ma tebbeeli sakkanaadi sanamuji, hidēn andi wonde en fow hidēn mari gandal, e hin-le gandal adday mawnintinaare, kono giggol tiidinay. ² On mo no sikki no andi godsun, haray fahin o andaali ko honno haanaa andireede.

³ Kono si goddo yidii Alla, haray Alla no andi mo. ⁴ Fii telen-ma huutorgol tebbeeli sakkanaadi sanamuji din, hidēn andi wonde sanamu wonaa godsun tigi e oo aduna, ko Alla gooto tun woodi. ⁵ Pellet no woodi piiji reweteedi duududi ka kammu e ka leydi, jogoraadi wa si tawii ko allaabé maa joomiraabe. ⁶ Kono enen ko Alla gooto marden, on Baabaajo, on mo kala huunde iwri e mun, e on mo wonanden, e Joomi gooto, dun ko Iisaa Almasiihu on, on mo piiji din fow woniri, e on mo wonirden.

⁷ Kono fow alaa ngal gandal. Kodun wadi, ben wowtube sanamuji, haa jooni si no jaamude ngun teewu anditay fii ko sakkaa kon. Nde tawnoo bernde mabbe

nden no lo'i, dun tuuninay 6e.⁸ Hinaa neema bannata en e Alla. Si en naamaali, dun duytataa en huunde, si en jaamii kadi, dun beydataa en huunde.

⁹ Ko woni tun, reenee fii wota ko newnanadon wadugol kon wonan lo'ube ben peggal. ¹⁰ Ko fii si goddo aru e yi'ude ma, an oo jooma gandal, hida nafoo e nder juulirde ka sanamuucci rewetee, taw si nden bernde makko lo'unde poodataa mo jaamugol tebbeeli sakkanaadi sanamuucci? ¹¹ Dun haray on lo'udo mulirii sabu «gandal» maa ngal, dun ko on musiddo mo *Almasiihu on maayi fii mun! ¹² Si on wadirii non junuubu e telen-ma musibbe ben, e nder barmingol bernde mabbe lo'unde nden, haray on wadii junuubu e telen-ma Almasiihu on. ¹³ Ko dun wadi, si tawii jaametee wonay sabu peggal musiddo an, haray mijnaamataa teewu hande kadi, fii wota mi libu musiddo an on.

Fii ko Haanani Sahaabaajo

9 ¹ E hara hinaa mi dimo? Kaa hinaa mi *sahaabaajo? Kaa mi yi'aali Iisaa Joomi men on? Kaa hinaa on kuugal an e telen-ma Joomi on?² Hay si tawii hinaa mi sahaabaajo fii wobbe ben, onon bete ko mi sahaabaajo fii mon. Ko fii ko on maande sahaabankaaku an ngun e telen-ma Joomi on.

³ E hino doo ko mi jaaborta jaawoobe lan ben kon: ⁴ E hara haananaa men ka men jaama men yara? ⁵ Kaa haananaa men ka men yaada e debbo amen mo men kafidi diina, wano beya sahaabaabe woni warrude non, e musibbe Joomi men on, e Petruusu? ⁶ Kaa ko min tun e Barnabaasi haani gollude fii no men wuurira? ⁷ Ko suufaajo hombo fawtotoo hoore mun e nder suufayaagal mun? Ko hombo tutata leggal *wiijnu, hara jaamataa bibbe maggal on? Ko ngaynaako hombo aynata wuro, ronka yarude biraadan din daabeeji?

⁸ Ko mi wowlata kon wonaa ko iwri e mijiwoji neddanke, ko fii Sariya on kadi ko dun wi'i. ⁹ Ko fii no windii ka Sariya Muusaa: «Wota mo buuma hunduko ngaari

ndin nde hindi yaabana dun maaro.»¹ E hara Alla no aanidi e ga'i din? ¹⁰Kaa ko fii men o wowlirani nii? Hiiyii, ko sabu men enen dun windiraa. Mo no remude yo remir tama'u, e on mo no yaabude yo yaabir tama'u hebugol gebal.¹¹ Si tawii men aawii ko iwri e Alla hakkunde mon, taw si haanaa ka men sojita e mon piiji aduna? ¹² Si tawii dun no haanani wobbe goo e hoore mon, haray menen ittii e sikke.

Kono men huutoraali kon ko haanani men. Kono meden ronditii fow, fii wota men fallu Kibaaru Moyyō *Almasiihu on.¹³ E on andaa wonde ben wadoobe golle *juulirde mawnde nden ko e dun jaamata, e wonde golloobe ka *layyorde ben kadi no mari gebal ka layyorde?¹⁴ Ko wano non kadi Joomi on no yamiri wonde fejninoobe Kibaaru Moyyō on ko e makko wuurata.

¹⁵ Min non mi huutoraali hay huunde e din haanandi lan, awa mi windiraali dun kadi fii yo mi newnane. Ko fii mayde nden no buranimmi edii goddo ittude lan e ndee huunde nde mi mawninorta. ¹⁶ Ko fii hewtaa ka mi mantora yottingol Kibaaru Moyyō on, bay dun ko ko waddii mi. Si mi fejninaali Kibaaru Moyyō on, bone wonanay lan. ¹⁷ Si tawii ko e hoore anniye mi woni wadirde, haray mido mari njoddi. Si tawii non mi fawa wadugol dun, haray mi waday woni golle de mi halfinaa.¹⁸ Awa ko hondun non jooni woni njoddi an ndin? Ko waajagol fii Kibaaru Moyyō on e baawo yantugol njoddi e tortagol ko haanani waajotoodo kon.

¹⁹ Ko fii, fii kala mido rindi e hoore wondo woo, mi waditii maccudo fow fii no adadu burdo mawnude on hebora. ²⁰ E telen-ma Yahuudiyankeebé ben, mi wa'a wa Yahuudiyankeeo, fii no mi hebira Yahuudiyankeebé ben. E telen-ma wonbe e ley Sariya on kadi, mi wa'a wa wondo e ley Sariya on, fii no mi hebira wonbe e ley Sariya on ben, fii kala min tigi hinaa mi wondo e ley Sariya on. ²¹ E telen-ma be alaa e ley Sariya on ben kadi, mi wa'a wa mo alaa e ley Sariya on, fii no mi hebira

ⁱ9.9 Yan. 25.4

6e alaa e ley Sariya on 6en, e hin-le min tigi wonaa wonde mi alaa e ley Sariya Alla on, kono mido e ley Sariya Almasiihu on.²² Mi lo'ida e lo'ube 6en fii no mi hebira lo'ube 6en. Mi wonii fow e telen-ma yimbe 6en fow, fii no gasirta woo mi wona sabu dandugol wobbe.²³ Mi wadiri fow sabu Kibaaru Moyyo on, fii no mi hebrioya gebal.

²⁴ E on andaa? Wonbe foolotirde e dogudu 6en fow no dogude, kono ko gooto foolata heba njoddi. Awa dogiree wano non, fii no hebiron njoddi.²⁵ Kala foolotirteedo waday kala noone eltal bandu, fii no o hebira *meetelol ngol luttataa, kono enen ko meetelol luttoowol.²⁶ Min non mido dogude, kono hinaa dogudu meereeru. Mido uttaade, kono hinaa fii uttagol hendu ndun.²⁷ Liddu dun on non, mido yangude bandu an ndun, mido waawi ndu, fii nde mi gaynoyi waajaade beya, min tigi wota mi pottine.

Mise Yettaade e Taariika Isra'iilayankeebe 6en

10

¹ Musibbe an, mi faalaaka yo on yejjitu wonde baabiraabe men 6en fow wonno e ley duulere, 6e fow 6e tayitiri ka baharu.² Be fow 6e lootaa maande gomdinal ka duulere e ka baharu e nder humondiral e Muusaa.³ Be fow 6e jaami jaametee gooto iwrudo e Alla.⁴ Be fow 6e yari njaram gootan iwrudan e Alla, ko fii ko e fetere iwrunde e Alla jokkunoonde 6e nden 6e yaraynoo. Ko Almasiihu on wonnoo nden fetere.⁵ Kono burbe 6en e mabbe weltinaano Alla, kodun wadi si 6e maayi ka wulaa.

⁶ Awa dun fow ko wadiri ko fii hollugol en mise, fii wota en hebu faaleeji bondi wano 6e hebirnoo non.⁷ Wota on wonu rewoobe sanamu, wano wobbe wonirnoo e hakkunde mabbe, wano windori non: «Jamaa on joodii fii jaamugol e fii yarugol, bawto dun 6e immii fii fijirgol jiibaare.»⁸ Awa wota en jokku jinaa, wano wobbe e mabbe wadirnoo non, haa guluuje noogay e tato maayi nande wootere.

^j10.7 Egg. 32.6

⁹ Wota en ndarndo *Almasiihu on, wano wobbe e mabbe ndarndornoo non, ben be bolle mulunoo. ¹⁰ Wota on ñermu, wano beya ñermirnoo non, ben be malaa'ikaajo muloowo on warunoo.

¹¹ Dun, ko hebiri be ko fii yo wonan en misal, windiraa kadi fii hajagol en, enen bee tawaabe ka lannoode aduna. ¹² Kodun wadi, on mo no sikki no darii, yo o reeno wota o yanu. ¹³ Ndarndannde woo hebaali on nde goddo goo hebaali. Alla ko Sella-Finddeejo, o newnataa ndarndedon toonin doole mon den, kono e nder ndarndannde nden o adday feere no sortoron e mun, e no waawiron nde dartorde.

¹⁴ Kodun wadi, yo yibbe an, dogee rewugol sanamu. ¹⁵ Ko wa yimbe faamube mi woni on yewtirde, onon tigi jaawee ko mi wi'i kon. ¹⁶ Jardukun du'aa kun wonden du'orde kun ko yubbondirkun e yiyan Almasiihu on. Bireedi mo wonden tayitude on, ko yubbondirdo e bandu Almasiihu on. ¹⁷ Bay ko bireediwal gootal woodi, enen e duudude men ko en bandu wooturu. Ko fii en fow hidé hawti bireediwal gootal.

¹⁸ Ndaaree bee *Isra'iilayankeebe wonbe jaamude daabeeji sakkaadi din. Hinaa yubbondirbe e *layyorde nden? ¹⁹ Awa ko hondun mi woni wi'ude? Wonde tebbeeli sakkaadi fii sanamuaji din ko godsun? Kaa sanamuuru ko godsun? Oo'o!

²⁰ Kono kon ko rewoobe sanamuaji ben woni sakkaade, ko jinnaaji din be woni sakkanaade, hinaa Alla. E hin-le mi faalaaka yo on humondir e jinnaaji din. ²¹ On waawataa yarirde jardukun Joomi on, yariron kadi jardukun jinnaaji din. On waawataa hebude ka jaametee Joomi on, hebon kadi ka jaametee jinnaaji din. ²² En faalaa memminde nawliigu Joomiraado on? Kaa en buru mo dolnude?

Fii Hettaare Wonannde Gomdindo on

²³ Fow no newnaa, kono hinaa fow wondi e nafa. Fow no newnaa, kono hinaa fow tiidinta. ²⁴ Wota gooto dabbu nafa mun on, kono yo dabbu fii heddiibe ben.

²⁵ Naamee kala teewu ko yeeyetee ka luumo, hara on sikkitaaki ka bernde mon.

²⁶ Ko fii: «Leydi ndin e kala ko ndi wondi ko Joomiraado on wonani.»^k

²⁷ Si tawii mo gomdinaa saatinii on, e hin-le hidon faalaa yahude, jnaamee kala ko weebitanoyadon, hara on sikkitaaki ka bernde mon. ²⁸ Kono si goddo wi'ii on: «Dundoo ko ko ittaa sadaka», haray wota on jaamu sabu on andindo on e sabu bernde nden. ²⁹ Hinaa fii bernde mon nden mi woni yewtude doo, kono ko fii bernde oya nden. Awa ko fii hondun ndimankaaku an ngun jaawirtee bernde oya nden? ³⁰ Si mi jarnii Alla e nder ko mi jaamata kon, haray ko hondun mi felirtee fii on jaamete mo mi jarni Alla fii mun?

³¹ Woni on jaamay, woni on yaray, woni kala ko wadoton, wadiree piiji din fow fii mangu Alla ngun. ³² Wota on wonan hay gooto peggal, woni *Gereekiyankeeben, woni Yahuudiyankeeben, woni *moftal Alla ngal. ³³ Wano mi woniri weloowo wondo woo e si fow non, mi alaa dabbude nafa an on, kono ko nafa burbe duudude ben fii no be dandiree.

11

¹ Awa nembee lan, wano min kadi mi woni nembirde *Almasiihu on non.

Fii no Goddo Haani Wonirde e nder Rewugol Alla

² Mi mantii on fii ko on yejjitali fii an kon e di fow, e ko maanditidon janndeeji din kon, wano mi hewtiniri on si non. ³ Kodun wadi si mido faalaa yo on andu wonde Almasiihu on ko hooreejo kala neddsanke, gorko kadi ko hooreejo e fee beyngu mun, Alla kadi ko hooreejo e fee Almasiihu on. ⁴ Kala gorko hippido kufune, nde no toroo Alla, maa no haala ko Alla longini dun, haray o yawike hoore makko^m. ⁵ Ko wano non kadi, kala debbo wondo toraade Alla maa haalude ko Alla longini dun, hara o taaraa, haray o yawike hoore makkoⁿ. Haray no wa'i

^k10.26 Zab. 24.1

^m11.4 Maa: «o yawike hooreejo makko on».

ⁿ11.5 Maa: «o yawike hooreejo makko on».

wa si tawii kanko debbo on himo fembii.⁶ Ko fii, si debbo taaraa, haray yo o tayū sukundu makko ndun. Ko fii, si no hersinanii debbo ka sukundu makko ndun tayée, maa o femboo, haray yo o tiggo.⁷ Kono duhiido haanaa ka hippoo, ko fii ko o mbaadi e darja Alla, debbo non ko darja gorko.⁸ Kodun wadi, gorko hinaa e debbo suutaa, kono ko debbo suutaa e gorko.⁹ Awa kadi gorko hinaa sabu debbo tagiraa, kono debbo ko sabu gorko tagiraa.¹⁰ Kodun wadi, sabu malaa'ikaabe ɓen, debbo no haani hebude ka hoore mun maande laamu ngu o woni e ley mun ngun.¹¹ Kono e telen-ma humondiral men e Joomiraado on, debbo gasataa e baawo gorko, gorko kadi gasataa e baawo debbo.¹² Ko fii, ko wano debbo suutiraa e gorko non, ko wano non kadi tawi ko debbo danata gorko, dün fow non ko immorde e Alla.

¹³ Naawee dun onon tigi. E hara no hawri ka debbo toroo Alla, hara o taaraa?¹⁴ E hara aduna on tigi faaminaali on wonde no hersinanii gorko ka o accita saayannde?¹⁵ Kono hebugol sukundu ko darja debbo, ko fii sukundu ndu o yedaa ndun ko ko o buumora.¹⁶ Si tawii goddo no faalaa warrude noone goo, enen en alaa on naamu, *mofte Alla den kadi alaa on naamu.

Fii Nafakkaari Joomi on

(Mat. 26.26-29; Mrk. 14.22-25; Luk. 22.15-20)

¹⁷ E nder wadugol non dee yamirooje yeeso doo, alaa ko mi mantira on e nder ko mottondirton kon, hara hinaa fii ko buri moyfude, kono ko fii ko buri bonude.

¹⁸ Ko adii kon non, mi nanii nde mottondirdon woo sendondiral waday hakkunde mon. E banjye goo, dün no henanimmi.¹⁹ Bee yeddondire wona hakkunde mon, fii no holniibe ɓen feenira e hakkunde mon.²⁰ Jaka nde mottondirdon woo, hinaa fii jaamugol *nafakkaari Joomi on.²¹ Bay nde hidon jaama, mo kala kutoto nafakka mun on, jaama, hara goddo goo no weelaa, oya kajun no mandili.²² E hara on alaa cuudi ka jaamon e ka yaron? Kaa on hayfinay woni moftal Alla ngal,

hersinon ɓe alaa huunde ɓen? Ko hondun mi wi'ata on? Mi mantay on? Mi mantataa on e dун!

²³ Ko fii, ko ko mi hebiri Joomi on kon mi hewtini on. E nder jemma mo Iisaa Joomi on janfaa e mun on, o yettuno bireedi, ²⁴ o jarni Alla, o tayiti, o wi'i: «Dundoo ko bandu an, wonandu on ndun nii, waddee dundoo maande ko anditiron fii an.»²⁵ Ko wano non kadi, ɓay ɓe gaynii jaamude, o yetti jardukun wadorkun njaram, o wi'i: «Kun jardukun ko maande fii *ahadi heyri tippundi e yiyan an dan, waddee dundoo maande ko anditiron fii an, saa'i nde yaroton e mun woo.»²⁶ Ko fii nde jaamoton oo bireedi woo, yaron e kun jardukun, on wowlay fii mayde Joomi on haa jaande o artoyi.

²⁷ Kodun wadi, kala onjaamudo on bireedi, yari e kun jardukun Joomi on, hara ko no haaniraa, o wonay felniido e telen-ma bandu e yiyan Joomi on. ²⁸ Awa, yo mo kala miijitano hoore mun si o jaama on bireedi, maa o yarira kun jardukun. ²⁹ Ko fii kala on jaamudo yari e baawo anditugol bandu Joomi on, haray ontigi jaamii yarii jaawoore jaawaynde dun kajun tigi. ³⁰ Kodun wadi si no e hakkunde mon nawnube buy e kitasoloobe buy, e on mayraama wobbe. ³¹ Si enen tigi en jaawitike, en jaawoytaake. ³² Kono Joomiraado on no jaawude en donkina, fii wota en jaawidoye e aduna on. ³³ Kodun wadi, yo musibbe an, nde mottondirdon fii nafakkaari ndin woo, habbondiree. ³⁴ On mo tawi no weelaa, yo jaamu ka mun, fii wota on mottondir fawon jaawoore e hoore mon.

Mi jaaboyto deya lande, nde mi hewtoyi.

Fii Dokke Ruuhu Seniido on

12 ¹E telen-ma dokke iwrude e Ruuhu Alla den, yo musibbe an, mi faalaaka yo on ronku andude dун. ²Hidon andi fewndo ko on gomdinaa, hidon selnaa, nawraa e sanamuoji mbobooji. ³Ko dun wadi si mi wi'ay on: kala mo Ruuhu Allaahu on

ardii e nder ko o wowlata kon, wi'ataa: «Iisaa ko hudaado.» Hay gooto kadi waawataa wi'ude: «Iisaa ko Joomi», si hinaa *Ruuhu Seniido on ardi mo.

⁴Dokke den no serti, kono Ruuhu Allaahu on ko gooto. ⁵Balle den kadi no serti, kono Joomiraado on ko gooto. ⁶Golleeji din kadi no serti, kono ko Alla gooto on woni wadude dî fow e yimbe ßen fow.

⁷E hin-le, mo kala ko Ruuhu Allaahu on fejjnini e mun kon ko dokkal fii nafa fow. ⁸Ko dun wadi, Ruuhu on yeday goddo on kongol faamu, on Ruuhu gooto yeda oya on kongol gandal, ⁹on Ruuhu gooto yeda goddo goo gomdinal, on Ruuhu tigi yeda goddo goo jawndugol, ¹⁰goddo goo dokkal fii wadugol kaawakeeji moyfyi, goddo goo haalugol ko Alla longini dun, goddo goo gandal fii sendindirgol noone ruuhuji, goddo goo noone *haalaaji janani, goddo goo nantingol din haalaaji. ¹¹Ko on Ruuhu gooto bajjo wadata dî piiji fow, senditana mo kala e ko mun, wano o yidiri non.

¹²Kodun wadi, wano tawiri non bandu ndun ko wooturu, hindu mari tere buy. Tere bandu ndun non kadi e duudude, kobandu wooturu de mari. Ko wano non wonirani *Almasiihu on. ¹³Ko fii ko Ruuhu gooto *lootiraden fii wonugol bandu wooturu. En fow yarnaden Ruuhu Alla gooto on, woni non Yahuudiyankeebé ßen, woni *Gereekiyankeebé ßen, woni jiyaabe ßen, woni rimbe ßen.

¹⁴Ko fii bandu ndun wonaali teral gootal, kono tere buy. ¹⁵Si koynal ngal wi'ii wonde: «Bay hinaa mi jungo, mi tawdaaka e bandu ndun», dun ittataa ko ngal teral e bandu ndun. ¹⁶Si nowru ndun kadi wi'ii wonde: «Bay hinaa mi yiitere, mi tawdaaka e bandu ndun», dun ittataa ko ndu teral e bandu ndun. ¹⁷Si tawno bandu ndun fow wonno yiitere, ko honno ndu naniraynood? Maa si bandu ndun fow wadano nowru, ko honno ndu faamiraynood barngol? ¹⁸Kono Alla wadi teral kala e bandu ndun no o faaliraa non. ¹⁹Si fow wonno teral gootal, ko honto bandu ndun wonaynood? ²⁰Jooni non, tere buy no woodi, kono bandu ndun ko wooturu.

²¹ Yiitere nden waawataa wi'ude jungo ngon: «Mi hatonjinaa e maa.» Hoore nden kadi waawataa wi'ude koyde den: «Mi hatonjinaa e mon.»²² Dun-le toode, tere bandu wa'ude wa si no buri lo'ude den, ko den woni hittude,²³ e de tanyiniden no buri hayfude den e bandu ndun, hiden hundiri de teddungal burngal tiisude. E hin-le tere men burde hersinaade den, koden burden surrude,²⁴ de hersinaaki den kan hatonjinaa e dun. Alla wadiri bandu ndun e noone mo bureten teddinirde jakkiraade den,²⁵ fii wota liddondiral wadu e nder bandu ndun, kono yo de nafindir.²⁶ Si teral tampii, deya tere fow tampiday e maggal. Si teral gootal teddinaama, deya tere fow weltoday e maggal.

²⁷ Ko on bandu Almasiihu on, mo kala e mon ko teral e mayru. ²⁸ Awa, ko Alla adii wadude e nder *moftal ngal, ko *sahaabaabe, dimmun dun ko haaloobe ko Alla longini dun, tammun dun ko jannoobe, bawto dun dokkal fii kaawakeeji moyyi, e dokke fii jawndugol, e wallugol, e ardagol, e wowlugol e noone haalaaji janani. ²⁹ Hara fow ko sahaabaabe? Kaa hara fow ko haaloobe ko Alla longini dun? Kaa hara fow ko jannoobe? Kaa hara fow waday kaawakeeji moyyi?³⁰ Kaa hara fow yeda dokke jawndugol? Kaa ko fow yedaa wowlugol e haalaaji janani? Kaa hara fow ko nantinoobe din haalaaji?³¹ Kono himmanee dokke burde moyyude den. Awa mi hollay on kadi laawol burngol moyyude ngol.

Fii Giggol

13

¹ Hay si mi wowlii e haalaaji yimbe ben e di malaa'ikaabe ben, si tawii mi alaa giggol, haray ko mi talenhun sila senyooohun, maa foolifen wondo e iidude. ² Hay si mi yedaama dokkal haalugol ko Alla longinimmi kon e faamu fii gundooji din fow e gande den fow, e hay si mi hebii gomdinal haa ka tawata mi dillinay pelle den, si tawii mi alaa giggol, haray hinaa mi fus. ³ Hay si mi okkitirii keyeeji andin fow fii nammingol miskinbe ben, e hay si mi okkitirii bandu an ndun fii yo ndu sunne, si mi alaa giggol, dun nafataa lan huunde.

⁴ Giggol ko mujal, giggol ko moyūki, giggol nawlataa, giggol mantotaako, hinaa heewungol mawnintinaare. ⁵ Ngol waasaa needi, ngol dabbataa nafa maggol, ngol yaawataa seytinde, ngol marataa bone. ⁶ Ngol weltortaa angal peewal, kono ko goonga ngol weltorta. ⁷ Giggol hejjay ko woni woo, hingol hoolii ko woni woo, hingol tanyinii e ko woni woo, hingol wakkilii ko woni woo.

⁸ Giggol ngol lannataa haa poomaa. Haalugol ko Alla longini dun feyay, *haalaaji janani kadi feyay, gandal kadi feyay. ⁹ Ko fii gandal men ngal hinaa timmungal, ko haaleten kon e nder ko Alla longini en kon kadi hinaa ko timmi. ¹⁰ Ko fii, nde ko laatii kon aroyi woo, ko timmaa kon feyay. ¹¹ Wa fewndo ko mi wonnoo paykun, mi wowlirayno wa paykun, mi mijorayno wa paykun, mi jaawirayno kadi wa paykun. Bay mi wonii mokobaa, mi feyani paykunyaagal. ¹² Hande hidēn tintora ndaarorgal e noone no niibbitiri, kono en yi'oyay kene e kene. Ko mi andi kon hande timmaa, kono mi andiroay wano Alla andirimmi non. ¹³ Jooni non kodii piiji doo tati luttata: ko gomdinal e tama'u e giggol. Kono koburi mawnude kon, ko giggol.

Fii Dokke e Longineede noone Haalaaji

14 ¹ Awa dabbee giggol ngol, himmanon dokke iwrude e Ruuhu Alla den, tentinii haalugol ko Alla longini dun. ² Dun, on wowlu do e *haala janana, haray hinaa yimbe ben o wowlani, ko Alla. Ko fii hay gooto alaa mo faamude, awa kadi ko ruuhu o woni wowlirde din gundooji. ³ Kono haaloowo ko Alla longini dun kon ko yimbe ben o woni yewtude, o tiidina be, o wakkilina be, o yarlina be. ⁴ On wowloowo e haala janana non ko hoore mun tun o woni tiidinde, kono wondo haalude ko Alla longini dun kon kajun ko *moftal ngal o woni tiidinde. ⁵ Mido yidi on fow yo on wowlu e haala janana, kono ko mi buri faaleede kon ko yo on wonu haaloobe ko Alla longini dun. Ko fii on haaloowo ko Alla longini dun no

buri wowloowo e haalaaji janani on mawnude, si hinaa hara on neddo nantin dun fii no moftal ngal tiidiniree.

⁶Jooni non, yo musibbe an, si mi arii ka mon e yewtugol on e haalaaji janani, haray ko hondun mi nafi on, si wonaa hara ko kongol gandal maa jannde maa haalugol ko Alla longini dun maa fejyinannde mi woni wowlude? ⁷Si tawii aalaaji di wuuraa no wadude hito, wano serdu maa hoddu, si hito majji on laabaali, haray ko honno andirton galli majji on? ⁸E si tawii hito *liital ngal laabaali, ko hombo ebbindantoo hare nden? ⁹Onon kadi wano non, si tawii on alaa yewtude haala faamotooka e nder ko wowloton e haalaaji janani kon, ko honno 6e andirta ko wondon wi'ude kon? Ko fii haray ko hendlu ndun wondon wowlande. ¹⁰Noone haalaaji buy no woodi e oo aduna, kono alaa e majji ngol alaa firo. ¹¹Si tawii non mi faamataa haala ka goddo woni yewtude lan kan, mi wonanay mo janano, kanko kadi o wonanammi janano. ¹²Onon kadi non, bay hidon himmande dokke iwrude e Ruuhu Alla den, yo taw ko fii tiidingol moftal ngal wondon himmirande den dokke haa feyita.

¹³Kodun wadi, on wondo yewtude e *haala janana longinaaka, yo toro fii no waawira nantinirde. ¹⁴Ko fii si mido toraade Alla e haala janana longinaaka, haray ruuhu an on no toraade, kono haray mi alaa faamude. ¹⁵Awa ko hondun mi wadata? Haray yo mi toror ruuhu, kono yo mi toror kadi faamu, mi beytira ruuhu, kono mi beytira kadi faamu. ¹⁶Si hinaa dun, si a mantirii Alla ruuhu on, ko honno joodiido tun e hakkunde hedotoobe ben jabirta «aamiina» e nder ko wondaa jarnude kon, bay o andaa ko hondun wondaa wi'ude? ¹⁷Ko goonga, hida jarnirde no moyiri, kono a tiidinali oya.

¹⁸Mi jarnii Alla ko tawi kon mido wowlude e haalaaji janani buri on on fow.

¹⁹Kono ka nder moftal, ko haalirgol hakkille an den kongudi jowi jannaydi beya buranimmi haalugol kongudi guluuji sappo e haala janana. ²⁰Musibbe an, wota on

mijor wa paykoy. E telen-ma ka bone, wonee paykoy tosokoy, kono mijoron wamokobaabe.²¹ Ko fii no windii ka Sariya, Joomiraado on no daali:

«Ko yimbe ɓe haalaaji janani
eɓe kundule janane
mi wowliranoya oo jamaa.
Hay dun ɓe hedoytaako lan.»ⁿ

²² Awa, haalaaji janani din ko maande fii ɓe gomdinaa ben, hinaa fii gomdinbe ben. Kono haalugol ko longinaa kon ko maande fii gomdinbe ben, hinaa fii ɓe gomdinaa ben.

²³ Si tawii moftal ngal fow mottondirii, mo kala no wowlude e haalaaji janani, hedotoobe nii tun arii, maa ɓe gomdinaa, e hara ɓe wi'ataa ko on feetube? ²⁴ Kono si tawii fow no haalude ko Alla longini dun, mo gomdinaa maa hedotoodo nii tun aru e taweede, dun fow faaminay mo fii junuubaaji makko, jaawa mo kadi,
²⁵ gundooji bernde makko nden kadi fejninte, onsay o sujjay ka leydi, o rewa Alla, o qirritoo wonde ko goonga Alla no hakkunde mon.

Fii no Moftal ngal Haani Wonirde

²⁶ Musiɓbe an, ko honno non warreten jooni? Nde mottondirdon woo, mo kala e mon no mari beytol, maa jannde, maa ko fejninanaa, maa haala janana, maa noone nantingol. Yo fow wadire fii tiisingol. ²⁷ Si no wowleede e haala janana, wota buru dido maa tato, e yo ɓe lontondir, tawa kadi no woodi nantinoowo.²⁸ Si nantinoowo alaa, haray yo wowloowo on deyū ka mottondiral, o yewtitoo ka bernde makko, o yewta Alla kadi.

²⁹ Fii haaloobe ko Alla longini dun ben kajun, yo dido maa tato yewtu, beya taskoo ko yewtaa kon. ³⁰ Si goddo goo fejninanama goddu, yo oya on fanku.³¹ Ko fii on fow hidon waawi lontondirde haalon ko Alla longini on kon, fii

ⁿ14.21 Isa. 28.11-12

no fow jangira wakkiloo.³² Ruuhuji haaloobe ko Alla longini dün ben no yankinanii ben haaloobe ko Alla longini dün.³³ Ko fii Alla hinaa Alla jiiboldu, kono ko mo o buttu.

³⁴ Ko yo rewbe ben deyýu ka hakkunde mbatu, wano woniri non e nder mofte gomdinbe ben fow, bay newnanaaka be ka be wowla, kono ko yo be wonu yankiniibe wano Sariya on kadi wi'iri non.³⁵ Si tawii kambe rewbe ben hibe faalaa andude e tobbe goo, yo be lando moodibbe mabbe ben tigi ka cuudi. Ko fii no hersinanii debbo yewtugol ka hakkunde mbatu.

³⁶ Kaa ko e mon daaluyee Alla on iwri? Kaa ko haa e mon onon tun o ari?³⁷ On mo sikki ko haaloowo ko Alla longini dün, maa yedaado dokkal iwrungal e Ruuhu Alla on, yo o jabu wonde ko mi windani on kon ko yamiroore Joomiraado on.³⁸ On mo itti yiila e dün, wattantaake yiila e makko.

³⁹ Kodun wadi, yo musibbe an, himmanee haalugol ko Alla longini on kon, e wota on hadu wowlee e haalaaji janani.⁴⁰ Kono yo fow warru no haaniri non, hara ko no yaadiri.

Fii Ummutal Almasiihu on

15 ¹ Mi andinii on, yo musibbe, fii oo Kibaaru Moyýo mo mi fejjinani on, mo jabudon, on mo catidon e mun, tabitudon,² dün ko on mo dandiradon kadi, si tawii hidon jogori mo no mi fejjinirani on mo non, si tawii non hinaa non, haray on gomdinii mo meere.

³ Ko adii kon, ko ko mi hendii kon mi fejjinani on: Almasiihu on ko fii junuubaaji men din maayiri, wano windori non ka defte annabaabe ben,⁴ o surraa, o immintinaa ka nalaande tammera, wano windori non ka defte annabaabe ben.⁵ Oo wi'eteedo Petruusu yi'ii mo. E hoore dün kadi sappoo e didoobe ben yi'ii mo.⁶ Bawto dün, buri musibbe teemedde njowo yiidi mo nde wootere, be tawata burbe ben e hakkunde mabbe no wuuri fewndo doo, wobbe

ben maayiino.⁷ Bawto dñun kadi Yaaquuba yi'i mo. E hoore dñun, *sahaabaabe ben fow yi'i mo.

⁸ Bawto bendon fow, o hollitii e an min kadi oo wa'udo wa jibinaado hewtaali.

⁹ Ko fii hari min mi hewtaa sahaabaabe ben, mi handaa kadi e noddeede sahaabaajo, ko fii mido cukkotonoo *moftal Alla ngal.¹⁰ Ko sabu moyfere Alla nden wadi si mi woni ko mi woni kon. Awa kadi moyfere makko nden e telen-ma an wonaali meere. Ka liddu dñun, mi gollii buri ɓe ɓe fow. Kono fow e mun hinaa min, kono ko moyfere Alla wonde e an nden.¹¹ Kodun wadi, woni ko min, woni ko kambe, ko dundoo men waajii, ko dñun kadi gomdindon.

Fii Ummatal Maybe ben

¹² E hin-le, si men waajike wonde Almasiihu on immitike e hakkunde maybe ben, haray ko honno wobbe e mon wi'irta wonde ummutal maybe alaa?¹³ Si tawno ummutal maybe alaa, harayno Almasiihu on tigi immitaaki.¹⁴ Awa si tawii Almasiihu on immitaaki, haray waaju amen ngun ko meere, gomfinal mon ngal kadi ko meere.¹⁵ Haray kadi ko men seeditotoobe fenaande e fee Alla, ko fii men seeditanike Alla wonde o immintinii Almasiihu on, hara-le o immintinaali mo si tawno maybe ben immitotaako.¹⁶ Ko fii si tawno maybe ben immitotaako, harayno Almasiihu on kadi immitaaki.¹⁷ E si tawii Almasiihu on immitaaki, haray gomfinal mon ngal ko meere, haray haa jooni hidon e nder junuubaaji mon din.¹⁸ Harayno maydube e gomfinal Almasiihu on ben ko hayrube.¹⁹ Si tawii ko e nder oo aduna tun tanyinorden Almasiihu on, haray e hakkunde yimbe ben fow ko enen buri yurmude.

²⁰ Kono jooni non pellet Almasiihu on immintinaama e hakkunde maybe ben, ko kanko woni arano e dñun e nder maybe ben.²¹ Bay mayde nden ko sabu neddo gooto ardi, ummutal maybe ben kadi ko sabu neddo gooto ardi.²² Wano fow maayiri sabu *Aadama non, ko wano non kadi fow wuuritirta sabu Almasiihu on.

²³Kono mo kala e saffewol mun.Ko Almasiihu on woni arano on, si hikka don jeyaabe Almasiihu on 6en, nande ardu makko ndun. ²⁴Ontuma, darngal daroo, ka o jonnitata don laamu ngun Alla Baabaajo on, bawto bonnugol kala laamu e kala bawgal e kala doole.²⁵ Ko fii bee Almasiihu on laamoo haa tuma o watti aybe makko 6en fow ka ley koyde makko. ²⁶Gano sakkiteedo muleede on, ko mayde nden. ²⁷Kodun wadi si Alla wadii fow ka ley koyde makko. Kono si wi'aama fow yankinanaama mo, ka haqiiqa, haray on Yankinando mo kala huunde tawaaka.²⁸ Ende piiji din fow yankinanoyaa mo, onsay Biddo on tigi yankinanto on Yankinando mo kala huunde, fii no Alla wonira fow e di fow.

²⁹Awa ko hondun wonbe lootanaade maybe 6en maande kisiyee wadata? Si tawii maybe 6en immitotaako few, haray ko fii hondun 6e lootantoo maande kisiyee fii mabbe? ³⁰Enen non fii hondun saa'i kala hidan e masiibo?³¹Nande woo mido weebitanii mayde nden. Mido seedintini dun, yo musibbe an, wano mi mantori on non e nder humondiral e Iisaa Almasiihu Joomi men on.³² Si tawii ko e faale neddanke mi habiri kulle den ka saare Efeesi, haray ko nafa hondun mi heboya? Si tawii maybe 6en immitoytaako: «Haray naamen, yaren, bay jango en maayay.»³³ Awa wota on daynito, ko fii wondibbe bonbe bonnay jikkuuji moyyi.

³⁴Awa artee e ko feewi kon, wota on wadu junuubu. Ko fii wobbe 6en maraa gandal fii andugol Alla, ko fii hersingol on mi wowliri dun.

Fii Balli Waylaadi din ka Ummatal

³⁵Kono goddo no gasa wi'ude: «Ko honno maybe 6en immitoroya e ko bandu hondu 6e ardopta?»³⁶ Ko an yo njofoojo, ko sankataa kon fudataa si maayaali. ³⁷Ko sankataa kon hinaa bandu aroyooru ndun, kono ko abbere nii tun, no gasa ngawri maa awdi goo. ³⁸E hoore dun, Alla yeda nden abbere bandu no o faaliraa, awdi kala o yeda dun bandu ko hawrani dun. ³⁹Bandu fow wonaa gootun: wonndu ko

³²15.32 Isa. 22.13

ndu nedfanke, wonndu goo ko ndu kulle, wonndu goo kadi ko ndu colli, wonndu goo kadi ko ndu liyyi.⁴⁰ No woodi kadi tagooje kammuyankeeje e tagooje adunayankeeje, kono ɻari tagooje kammuyankeeje den no serti e ɻari tagooje adunayankeeje den.⁴¹ Naange ngen no marijari mun feere, lewru ndun no mari ɻari mun feere, koode ðen kadi no mari noone ɻariiji mun sertudi.

⁴² Awa ko nii kadi wonirani ummutal maybe ðen: si bandu ñolayndu sankama, ko ndu ñolataa immitoytoo.⁴³ Si bandu jiddundu sankama, ndu immitodoyo e darja. Si bandu lo'undu sankama, ndu immitodoyo e doole.⁴⁴ Si bandu adunayankeeru sankama, ndu immitoyto ruuhuyankeeru.

Si bandu adunayankeeru no woodi, haray bandu ruuhuyankeeru no woodi.⁴⁵ Ko dun wadi si no windii: «Aaden arano on, dun ko Aadama, hebi ngurndan, o wuuri.»^p Kono Aadama sakkitoro on ko ruuhuyankeejo yedoowo ngurndan.

⁴⁶ Hinaa arano on woni ruuhuyankeejo on, kono kobanduyankeejo, ko ko hikkii don kon woni ruuhuyankejun dun.⁴⁷ Neddo arano on ko e leydi ndin suutaa, ko mo ka leydi, neddo dimmo on kajun ko ka kammu iwri.⁴⁸ Ben ðe ka leydi no wa'i wa mo ka leydi on, ðen ðe ka kammu kadi no wa'i wa on mo ka kammu.⁴⁹ Ko wano nanditirden e mo ka leydi on non, ko wano non kadi nanditiroyten e oo mo ka kammu.

⁵⁰ E hino ko mi woni wi'ude kon yo musibbe an. Ka bandu ndun e yiyan dan waawaali hebude gebal ka *laamu Alla don, ko don kadi woni ko ñolata hebataa gebal e ko ñolataa kon.⁵¹ Awa e hino, mido wowlande on gundoo: en fow en maayataa, kono en fow en waylete,⁵² e ñder saa'ihun nii, yeru mayaango yiitere, ka wuttaandu *liital sakkitoral. Ko fii ngal wuttete, maybe ðen immitoo ko bontataa, onsay enen non en waylete.⁵³ Onsay bee nduu bandu ñolayndu lontiniree ndu ñolataa, awa kadi bandu maayayndu ndun lontiniree ndu

^p15.45 Fud. 2.7

maayataa.⁵⁴ Nde ndun bandu nolayndu lontiniraa ndu nolataa, e nde bandu maayayndu ndun lontiniraa ndu maayataa, onsay daalol windiingol ngol laatoto, wonde:

«Mayde nden modaama e nder polgal.»^q

⁵⁵ «Ee mayde, ko honto polgal maa ngal woni?

Ee mayde, ko honto ndagawal maa ngal woni?»^r

⁵⁶ Kono ndagawal mayde ko junuubu, awa kadi doole junuubu ko Sariya. ⁵⁷ Yo mantoore wonan Alla, on Yedudo en polgal immorde e Iisaa Almasiihu Joomi men on.

⁵⁸ Awa yo musibbe an yidaabe, wonee tabitube be dillintaako, burtee beydaade e golle Joomiraado on, e hoore andugol wonde, golle monden e telen-ma Joomiraado on hinaa meere.

Fii ko Faaboraa kon Gomdinbe ben Yerusalaam

16 ¹ E telen-ma mottindirgol fii wallitagol yimbe Alla ben, wadiree onon kadi wano mi yamiriri *mofte wonde Galaasi den non. ² Yo mo kala e mon hebu ko anniyii, wallini feere beru maral makko ngal ka jallal aranal e nder yontere nden, dün ko alattiire nden, fii wota on habbo haa tuma mi ari fii mottindirgol dün. ³ Dun, nde mi aroyi, mi wattiday e be subidon ben dokke monden, wondude e bataake, be naba *Yerusalaam. ⁴ Si tawoyii non bee mi yaha min tigi, mi yaadoyay e mabbe.

Fii Ebbooje Puulusa den

⁵ Mi yahoyay ka mon nde mi tayitoyi Masedonii, ko fii mi rewoyay Masedonii.

⁶ No gasa mi jallidoyay e mon, maa toode mi ruumida e mon, fii no ardoron mi ka mi yahata ton. ⁷ E ngol laawol doo mi faalaaka rewude ka mon e hoore hawjere, kono mido tanyinii wondugol e mon seeda, si Joomiraado on newnii. ⁸ Kono fow e

^q15.54 Isa. 25.8

^r15.55 Hus. 13.14

mun, mi wonay Efeesi haa ka Juldeere *Pentakosta.⁹ Ko fii dambugal njanal udditanike golle an nden, awa kadi aybe ben no duudi.

¹⁰ Awa si Timotee hewtii, wadiree noone no o hulirtaa hakkunde mon, ko fii himo gollira wa an min e nder golle Joomiraado on. ¹¹ Awa wota gooto aybin mo. Neltee mo e jam fii no o hewtira ka an. Ko fii mido habbodi mo e musibbe ben.

¹² Telen-ma oo musiddo an Apoloosi, mi wakkilinii mo fota fii yaadugol e musibbe ben ka mon, hinaa non dun woni faale makko on fewndo doo. Kono o yahoyay nde o hebi fajuhun.

¹³ Wattanee yiila tabiton e nder gomdinal ngal, wakkilon, tiidon. ¹⁴ Ko wadoton woo wadiree giggol.

¹⁵ Mi yamirii on kadi yamiroore goo, yo musibbe an. Hidon andi kobeynguure Astefaana nden adii gomdinde e nder Akaaya, be woni kadi e kurkanagol yimbe Alla ben. ¹⁶ Awa onon kadi yankinanee ben yimbe e kala gollidoobe e mabbe. ¹⁷ Awa mido weltori arugol Astefaana ngol, e Fortunaatusa e Akayuuka, bay be wadanii lan ko on waawataano wadande lan. ¹⁸ Ko fii be wallintinii wonkii an kin wano be wallintiniri wonkiji mon din non. Awa manee sifa ben yimbe.

Fii Salminaango ngon ka Waynondiral

¹⁹ Moftal ngal *Aazii salminii on. Akiila kadi e Piriskiila, wondude e moftal wongal ka suudu mabbe ngal, salminii on fota e innde Joomiraado on. ²⁰ Musibbe ben fow salminii on. Salmondiree, hirbondiron hirbondiral laabungal.

²¹ Min Puulusa, mi salminirii on jungo an ngon tigi. ²² On mo yidaa Joomi on, yo o laato hudaado. Yo Joomi on aru! ²³ Yo moyere Iisaa Joomi on wonu e mon.

²⁴ Mido yidi on on fow sabu Iisaa Almasiihu on. Aamiina!

PREMIÈRE ÉPÎTRE DE PAUL AUX CORINTHIENS

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée